

師
伏
堂
詩
草

序

夫西河授經光文學之選蘭陵傳藝作禮智之賦發辭炳曜燦著
簡筋陳義宏大實爲椎輪乃知玉版金鑲先顯陰陽之儀四始五
際上通天人之故龍蹲闡祕尼山匯其宗虎觀通德炎漢隆其業
宗聖立旨敷章賁華斐然經術蔚爲文詞然邵公學海注言深晦
高密經神箋語艱奧號爲樸學匪尙藻麗故儒林所紀罕覯緝製
藝文所志別錄詞賦若揚馬蔚興已虧雅頌曹王傑起更失風騷
魏晉而下隋唐而上眾制鋒起源流閒出潘陸孫許振采色於前
顏謝江鮑標芳塵於後莫能討源禮樂詎足敷讚聖旨蓋經學文
章道本相輔各盡所長尠能兼善繫古以來恆是憾矣鹿門夫子
長沙博士湘水經師琅邪授禮賓師曲臺潁川受書遂章齊學金
絲騰響服膺口授之遺球鐙載和豈撫航頭之字博徵青簡疏證

大傳詳搜石室信爲今文祖述素王存微言於公穀增改內傳歸罪案於劉歆書惑經申左之篇洗黨同妬真之陋豈徒孝經作疏攷石室之注本鄭志撰證表東家之定論哉夫更生論文必徵於聖稚圭勸學每尊於經良以佩實銜華迺流席珍之響稟式酌雅猶潤千里之河斧藻羣言斯吐納珠玉銘鈞六藝斯燦爛符采昔咸豐著頌九招乃歌箕虞勒銘五聲以聽功在表揚體歸贊美風陵著草春皇始創龍書九疑白雲潢陽猶傳玉厯逸聞綿邈莫考禪通古禮搜羅每存識緯用摛祕籍上煥宏功若乃祖龍肩餒二漢興規蒼鵠出地五胡亂晉藩鎮之禍旣奪唐統金元之寇終移宋社變青苗之法徒懲羹而吹齋忱黃袍之加致矯枉而過正三代之制旣壞於秦漢唐之規又隳於宋卓見千古允爲定論非夫洞達經濟深識興衰探原吐辭彌綸彝憲安能組織英華發揮史

志乎是知振葉尋根必正末而歸本窮高樹表貴體經而原道遠
景先哲總覽淵搆莫不通經以致用因文以明道夫子宏深典籍
彪炳華藻故能上方前作獨振近俗至於遊覽所及山川能說託
興有在靈臺寄通斯又元嘉之響正始之音足以邁儀鄭之雅篇
繼船山而稱述者矣觀久蒙甄鑄獲覩戶庭城陽內史忝列申公
之門梁國敬公愧有勵學之著每經啟告俾識源流賈嘉能言庶
參談經之席貞白妙製敢效摠持之序云爾受業夏敬觀謹譔

序

蓋自結繩既移乃列文象書契已作爰修辭藻固質文之代興惟
華實其相贍是以耆德開姚典謨攸灼姬宗踵子訓詁克炤累葉
而降斯道鼎新魯筆實繁其徒燔書莫斷其緒蓋古朴之氣漸替
而焜燿之旨彌繁矣炎德繼運羣言逾昌琢摩京都則班張演其
派升躋堂室則賈馬揚其鑣斯實步軌三五權輿四六而下帷董
子不無麗縉之文耽古桓生遂彰論著之富夫源邃者支衍而積
潦易涸荏壯者穎茂而折枝恆凋故理不勝辭用寡是謂采而乏
骨雉竄非誣然則耀靈蛇於掌握發雕龍於胸臆杼軸清英有如
成誦軒翥藝苑競推大筆非夫義理精詳訓詁明覈紀綱禮樂貫
鍊墳典憑經以騁思媿潘勗之淵通引書以助才類劉向之該博
其餘靡足觀矣孰能臻斯懿乎

國朝右文越古雅化作人大可豔發於蕭山竹垞鷹揚於秀水巽
軒儀鄭煥乎有文雅存卷施卓爾大雅類皆探真源於經藝闢康
莊於詞林萃案斷之專家續往籍之絕學茲爲羣矣難乎繼焉鹿
門夫子南邦詞祖東山聖徒閉廬覃思穿牀嗜古賈疏鄭注宏啟
其藩籬墨守膏肓別構其戶牖翼孝經小同之古義補爾雅景純
之遺說精言在抱儷體尤工作師伏堂駢文都爲一集飛館玉池
之巨製桂林湘水之華篇纂瑯嬛之綈粟締句從心綜崑崙之縹
囊才鋒奔命遂使聯章而圭璧合振翰而風雲蜚語厥宮商擊石
之歌鳳舞方之錦綺真珠之服龍盤豈直工文張鷟選學士之錢
隸事王擣抽何公之簞而已哉錦夙邀甄鑄曾登大匠之門謬副
賞音用愧桐亭之竹臂觀岱獄徒叩其崇穹若涉滄溟罔尋其垠
踣託茲沆瀣罄厥管蠡剗厠方新揄揚未沫漱芳傾漑如觀太學

之藏積玉碎金難作枕中之祕庶幾正聲不寢無亂州鳩之聰鵠
的是縣弗誤養由之矢云爾受業徐運錦敬譔

序

夫虎豹蔚姿光彪炳其彩鳳雀挺質羽翮振其儀故聖道所崇尊經攸著士儒之論文詞爲宗是以馬班有作厯七古而茂暉揚枚索篇卓筋本之彌曜導原吐芽間見秦策開基峻宇厥惟漢氏赤龍興規石渠講藝白虎聚論通德載編時則學官旣立經師相承雖意重樸敦未專文道而詞旨古質自蘊淵和子政校書敘錄最美穉圭上疏封事爲佳康成箋禮劭公解經雖曰注體迺屬奧文蓋當時經學文章相輔而行故體渾奇偶格律高上漢書所載別子所紀彬彬稱盛焉魏晉而下厥道逾彰齊梁迭承罕見散體故斯格獨備雅尙適古沈約任昉之徒文通明遠之輩鏟迹幽谿鑿芳靈固允資宗尙難其儕矣沿及徐庾其流遂靡綜斯以降有三憾焉自昌黎起於唐自謂力抹衰敝宋人繼之始立派名人習古

文無復晉宋之美旨趨平易頓改勁奧之觀元明而下咀習空聞
性理爲護身之符語錄卽名世之作非特漢人注疏咸歸掃地并
駢家魏集束置莫譚不知詞翰由祕貴妙曲深義理突來層杼鮮
罄迺以淺近構藻開筆俗世童孩易知婦女可曉末師窪識弊端
奚洗厥憾一也 國朝儒風卓犖經義麗天諸師授義步擬漢家
士之談經者或尙藻儷故說解樸實文亦茂美然而道有分盡功
難合齊伯閑從經卽廢初年之業容甫述學轉緩搜文之思豈才
識之不及哉特以經旨紛囂皓首莫殫疑誤易沿一執遺罅又或
迫於人事耗於神力是則諸儒之舍彼取此不能以旁鶩亂思揆
厥所由豈從蓋闕厥憾二也作者日鮮善體斯難或失之解或失
之實解則麗藻過綺累而不飛實則骨幹太清陋而不韻文質彬
彬然後君子度諸此義合者維艱厥憾三也若夫深洞經義宏發

詞令卓三憾而俱泯兼諸長以獨擅惟於夫子見之已夫子生稟
奇姿敏捷文藻中年說經彌尊伏勝暇日論禮心崇高密緼澤既
闕儀彩事富錯鎔已實咄鐘肆鳴夫頌讚之作歸諸美揚夫子以
闡發之旨光厯鴻之典伏戲畫卦易數因之胎垂史皇邠彤詒訓
於焉字乳而河洛寫圖妄肆疑經之鼓帝史異說疇定字聖之名
雪疑詔來二篇尙矣又况崔寔論政洞窺事宜蔚宗修史卓茂嘉
詞懲孤秦弱宋之非闢武侯謝傳之嫩本諸華藻以表史蹟洵與
特之蒐觀蔚宏之美構略條片端未概全質峻槃之篇固匯源於
泰始雜品之作又恢恢於元嘉斯則卷施適雅不得擅芳於前石
筍瑰奇允宜連蹤齊耀矣且夫桐柏盤根於龍門之岡非葉茂之
足峙蛟虬讚光於神渤之窟詎斑鱗以爲珍夫子方精力丹鉛游
心箋釋剖析經疑纂述宏冊區區文篇固視末致惟是上乘已失

妙馭罕能久經長昏乍覩鴻曜習處蛩穴忽聞鸞音法式所承端
資千禩豈僅都人爭傳寫左思之賦本學士推頌識庾信之妙文
遇合之事爲足欣榮也哉贊元學識誦陋語言淺膚管張筵持詎
合尚埃燭捫槃叩莫表什一然念從遊五載諄誨日親雖師承相
接欲贊難名而披誦篇章嗜愛莫已子屏表笥河之學詎屬諛稱
剪軒序東原之書敬述宗旨云爾光緒旃蒙協洽壯月受業賀贊
元謹序

師伏堂詩草卷一

善化皮錫瑞鹿門

擬古 以下庚午

寥寥歎清夜皎皎望明河
婉婉曠靈匹迢迢怨羲娥
黃姑與織女相望此中阿
曠歲不再逢良時恐蹉跎
七襄慨終日一水通微波
誰謂葦可杭跂彼將如何

擬迢迢牽牛星

猗猗谷中蘭采采貽遠人
豈伊微物美告子以芳春
故山杳以綿恩情不可親
寸心日千里何由致殷勤

擬涉江采芙蓉

高樓何迢遞迢遞在雲端
層臺帶飛霞翩翩若羽翰
中有絕代人其名字金蘭
常軒抱瑤瑟素手垂羅紈
淒風動清角聞者爲心酸
一彈朱鴈落再鼓元猿歎
哀吟顧何心眞賞良獨難
安得天風至共乘雙飛鶴

擬西北有高樓

詩草卷一

春風來何時拂我嘉樹林
新條發婀娜持此寄瑤音
美人歎遲暮山川阻重深
芳華日零落曷以傳我心

擬庭中有嘉樹

送友人往關中

太華三峰路轂函一線天
度關驚白草入幕泛紅蓮
秋水明鴻影霜風勁馬鞭
長安名勝地懷古莫畱連

東王懷欽

德基

江東獨步推文度唐代高人見
右丞我折梅花欲誰贈
閉門風雨一窗燈

春寒

以下辛未

百花含意歎春寒
日繞紅芽看牡丹
待得牡丹開放日
春寒已過又春殘

春草

湖南萬里綠萼萼野火燒殘又暖風志上血埋長憾碧美人心化
可憐紅黃昏青冢悲飄泊故國蕪城感始終何似蓬蒿三徑宅翠
雲吹墮夕陽東

春暮

豔陽天氣一百五多在烟綿雨絮中春到九分春更減海棠又退
一分紅

無題

黃金屈戌玉簾櫳零亂閒愁訴曉風窺鏡君應美城北挂冠臣本
住牆東蓮房密意分歡子楊柳新聲唱惱公長是相思消是淚秋
來台化海棠紅

幾番空出又空歸夢裏醒時是也非金虎氣涼心更熱玉蟾身瘦
藥難肥徒憐蕉葉含情捲不見楊花撲面飛莫抱檀槽歌子夜尙

書減盡舊腰圍

冰淚珠絃一手彈
叢鈴碎佩韻珊珊
最憐卮酒亡蛇足
巧諱金丹託馬肝
藥竊姮娥天合悔
石填精衛海難乾
玲瓏樓閣虛無處
望遍仙城十二欄

紅情吹作暮江霞
別夢何曾到謝家
碧海青天少烏鵲
深山大澤有龍蛇
尋春蝴蝶潛消粉
結網蜘蛛半損花
飛燕自雙鴻自隻
挂星安用玉河槎

銀漢懷中未墮星
捲簾猶自惜娉婷
託身靈石三生約
遮面玻璃一扇屏
荷鏡無光空皎潔
藕絲作線太玲瓏
玲美人香草靈均淚
洒入湘蘭萬古青

過彭孺人墓

鬼火衰紅雁叫烟
茫茫畫出不情天
傷心最是墳頭草
玉骨長埋

又一年

芙蓉一面舊時春每到春來最慘神今日芙蓉花又落秋江蘭澤更無人

寒夜

茫茫大海波一往不復還匆匆咸池景一去誰能攀寒日行北陸忽焉歸故山分寸不自惜何以役愚頑大言眾共笑盛名天所慳念此中夜坐慨然凋朱顏

曉仙謠仿飛卿

曉風蕭蕭鶴背直手牽燭龍引龍翼一聲天雞喚地雞雞子團團作黃色渴烏夜飲滄海乾海底湧出玻璃盤羲和鞭敲盤九寸滿天都帶桃花暈燈光半死混沌哀蒼蠅大笑天門開玉妃喚月月輪墮移得圓光入鏡臺

言直卷一
三
夢天擬長吉用原韻

娥宮萬瓦青瑤色大星垂垂鐘乳白玉女吹簫度紫雲仙風飄袂
紅桑陌九州茫茫羅罽下羣仙乘鸞猶走馬紅牆隔斷步虛聲銀
灣一抹如鉛瀉

紅梅引爲張觀察侍姬紅梅作觀察需次黔中以教案事下獄自
分必死遣散諸姬諸姬去而紅梅獨殉觀察出獄遣戍作詩以

悼紅梅

狂風吹墮臙脂雨翠羽啁啾作人語劫火連天葬落花衰紅茫茫
泣烟渚碧玉當年始破瓜粉痕微暈倚朝霞不攜桃葉春風扇獨
步瑤臺萼綠華春風錦帳櫻桃暖花氣濃香吹不斷嬌小江妃一
斛珠風流和靖孤山伴紅袖徘徊顧影妍廣平鐵石也心憐鉏耒
吹渡牂牁水又入蠻雲萬里天黑風夜走羅施國埋輪氣節原孤

直劒花深夜泣天魔鬼馬叢鈴響叩𦵏無端修竹巧彈蕉一寸曇
花見雪消金鬢夜舞雲南鼓珠淚春凝漢上簫憾紫愁紅花骨瘦
綠章又阨通明奏可憐請室欺釐纓正是寒天啼翠袖蠻牋細字
遺楊枝自分鐘鳴漏盡時紅線難偷金盒救綠珠終感石崇知玉
笛一聲天漠漠買索光連小星落怕上尙書身後樓空畱水部吟
邊悶芙蓉香冷滿簾霜玉蝶淒迷玉骨涼海上朝雲拋藥碗盧家
少婦泣金堂鏡臺蛛網遺脂凍羅虬歸去紅兒痛淡月疎林不見
人舊歡彷彿羅浮夢鸚鵡呼名最慘神隴頭誰寄一枝春貞心化
作紅心草猶望燕然塞上人

仿唐人絕句八首

黃沙十丈夜漫漫月照龍荒白骨寒數遍刀痕餘百戰一身猶自
在雕鞍

仿王少伯

杜宇聲聲望故鄉。碧簫吹徹楚雲涼。銀箏勸酒不能醉。明月滿天

湘水長。

仿李太白

一戰收京萬國春。滄江聞道靜胡塵。花門不宿天驕子。茅土惟封

柱石臣。

仿杜子美

離情幾度似春潮。野渡無人別路遙。樽酒尋君何處見。空山落葉

雨瀟瀟。

仿韋蘇州

臺城淒淒絕後庭。花汴水蕭條御柳斜。二十餘年湖海客。獨來淮上

看寒鴉。

仿劉夢得

何人攀折柳。麝麝花落樽前酒。半酣忽憶去年湖上樂。瀟瀟暮雨

唱江南。

仿白香山

夜醉青樓盡酒樓。樓臺燈火秣陵秋。秦淮碧水深千尺。不洗臙脂

并睥愁。

仿杜牧之

泣露衰蘭尚有香花枝零落月魂傷憾春無奈春方到蝴蝶一雙

飛過牆

仿李義山

馬王宮故址

賸水殘山策府開井蛙齷齪少雄才但高銅柱平蠻略不築黃金
取士臺殿起九龍當日盛謠成五馬後人哀綺羅散盡丹沙壞尙
有尋香蛺蝶來

送懷欽歸益陽用畱別韻

嘯傲荆山抱玉眠霓裳濟濟見羣仙朔風吹老蘅荃綠送別湘城
又一年

休洗紅

以下壬申

休洗紅洗多減顏色世故多蒼黃人心迷白黑真珠密字芙蓉箋
仿佛數行烏鰂墨

仿高青邱宮詞十首

君王昨夜宿蘇臺新得佳人敵國來傳語明朝按歌舞錦帆涇畔

早蓮開

吳宮

掌中腰細翠雲鬟初侍章華夜獵還莫向人閒憶天上人閒亦自

有巫山

楚宮

星影熒熒妝鏡開雷聲隱隱御車催六宮昨夜誰承寵皇帝新巡

海外來

秦宮

掃盡庭花日又昏蕭蕭夜月照長門靡蕪尚有遺芳夢未信君王

薄舊恩

漢宮

銅雀春深鎖碧雲燭臺光豔辭靈芸非朝非暮漳河北不羨江南

月二分

魏宮

絳縷分明映守宮嬋娟一萬倚珠櫳羊車也解憐佳麗直到門前

蠟炬紅 晉宮

閨武堂前含笑看蓮花步步佩珊珊玉兒沽酒親屠肉卻怪臨邛

太瘦寒 齊宮

結綺臨春春夢賒艷詞爭唱後庭花月宮夜夜光長滿新賜嫦娥

號麗華 陳宮

紅妝翠柳錦帆舟秀色纖纖欲上樓自到江南山黛好更添新樣

入眉頭 隋宮

一騎紅塵進荔枝玉環並轡入宮時沉香亭北花千樹不及凝香

隨一枝 唐宮

野望

大地悲風急高原亭午時長蒿繁野蔓敗葉挂疏枝飛鳥隨人影
孤鴻動旅思青山如送客行路且遲遲

晚行

天碧與山翠微茫似不分
雞飛上高樹鴉聚語孤墳
野火明如月炊烟蕩作雲
前途又何處風細雨紛紛

歲暮出郭

寒山絕芳菲蒼老愜幽興
數點梅花開娟娟露香徑
寺遠白雲多冷然一聲磬

白草寒蕭蕭黃沙亂相撲
上嶺不逢人斜陽挂疏木
車聲如隱雷隆隆出深谷

五雜俎

五雜俎五羊皮徃復還忘故
妻不得已歌屢屢

五雜俎作賦才徃復還臨邛
來不得已出嫁財

五雜俎舞傾城徃復還貌如
生不得已春潛英

五雜俎織素工往復還扇微風不得已長信宮
五雜俎胡笳拍往復還歸漢國不得已求孟德
五雜俎織作遲往復還生別離不得已東南枝
五雜俎襪生塵往復還覩麗人不得已賦感甄
五雜俎錦文迴往復還迎車來不得已遣陽臺
五雜俎機聲忙往復還歸故鄉不得已作女郎
五雜俎蓉帳暖往復還龍馭返不得已思展轉
五雜俎夢遊春往復還覓雙文不得已記會真
五雜俎五陵花往復還逢鈿車不得已問押衙

雜詩

以下癸酉

感事意不適駕言登崇岡長途鬱修軫曠野何青蒼白草標勁風
黃葉零微霜栖鳥歸其巢孤鴻冥冥翔物性非一倫人情豈有常

言集卷一
懷古不復見對此空茫茫

驅車至故郢懷古章華臺紅渠落渚宮楚王安在哉當其意氣盛
荒宴了無猜細腰寵佳麗長鬣延上才白起小豎子再戰荊門開
從此雲夢區亭館皆蒿萊鬱鬱楚妃歎茫茫莊舄哀可憐九龍殿
一例成塵埃

沅湘日東瀉長流屈賈愁誰令萬古心常代昔人憂楚漢昔隆盛
濟濟多王侯珠履延上客金樽進名謳處堂忽大敵厝火無良謀
維彼昂昂駒難爲泛泛鷗隻身竄天地盈皆交戈矛曲池久已平
富貴同蜉蝣高爭日月光輝輝映千秋

昔從安期生長跪問寶訣賜我琅函書青簡加綵纈鍊神養關元
成丹若霜雪陰陽與水火一一皆中節我欲騎紫鸞銜書上金闕
獻之扶桑翁告以壽世說九關不我顧但知餐玉屑寄謝白茅人

長歌返崖穴

龔遺難再見英衛不復來漢後無吏治唐亡無將才寂寞循吏傳
塵網淩煙臺束縛其策力智勇何由開時豈乏奇傑遺之在草萊
吾思塞上翁失馬謂爲福得馬而傷人後乃迭翻覆吉凶豈有定
其勢常倚伏幾先昧妖祥慮表變歌哭滄海幾成田高岸反爲谷
欣欣臨川烏慘慘長沙鵬韓非說難誅稽康養生戮未來多妄念
枯骨安能卜

三年學屠龍技成無所售百金買泚僻奇方致封侯虎鼠隨用舍
龍蛇聽沈浮古來雲臺勳豈必皆奇謀材大或難用珠明多暗投
末路詎可問天道常悠悠

龍章眩裸壤韶舞駭輿俗當世不見求何爲自急促昔有楚鄙人
日泣荆山玉太璞斯可完胡不衛其足物出非其時恆遭按劍辱

易缺毋磽磽無奇甘碌碌

屈賈祠

暮楚朝秦日堂堂見此人短歌天地老餘豔
澧沅春貴戚生龍比非時出鳳麟魏徵偏
斌媚香草句清新

鵬鳥翩翩去蕭然山寺寒有才輕絳灌無
意學申韓弊法恬嬉久清時痛哭難憐君
宣室召猶是古長安

道鄉臺

黯淡瑤臺月孤臣叫帝闈激昂良友誼遷
謫故君恩一疏奸人僞千秋直道存登臺
雲蔽日不見汴都門

題范文正公集

主聖讒猶熾名高眾已猜一開朋黨錄誰
信濟時才頌德成詩獄行邊實禍胎前知
將害事遺憾石徂徠

開閣天章曰頽風可漸除倘能更制度何至用荆舒弱勢誠難變
中樞不易居太平機已失空負萬言書

寄懷欽益陽

不見王摩詰離情爲爾長資江三百里迢遞隔瀟湘秋水芙蓉老
春風蘭芷香屋梁明月落飛夢到君傍

讀史

秦項雖亡冒頓張漫云鳥盡任弓藏英雄老受平城辱更與何人
守四方

堂陞陵夷輔相輕君王奴隸視公卿長沙上疏因周勃絳灌何心
譖賈生

西漢人才總出羣家奴功大拜將軍深源眞合投高閣可有所連
象冢勳

文物衣冠徧海陬已收閩粵又東甌華夷習俗隨遷變莫笑孫權取鹽州

陳湯已謫燉煌郡南越誰懸漢橐街黨禍紛紛正萌孽捐之祇解棄珠崖

早擬江山讓董賢效尤新莽始欺天賜山猶憶文皇帝枉鑄黃頭百萬錢

虞夏規模盜竊才徹宵燈火亦堪哀分明一樣周官法猶勝荆舒但理財

十萬園橋拜袞龍千官法駕幸三雍如何聖教方興日已有金人夢裏逢

米賊稱兵託鬼神蒼天已死出黃巾鵠鳴傳道由來異慣教兒孫作叛人

煌種天生豈盡亡終開董卓起西涼始知段熲封侯日尚有東西
未滅羌

東漢已收三代局孫吳更啟六朝先宋唐雖盛古風盡運轉黃初
數百年

阿瞞何意學周文割據羞稱鼎足分笑殺春秋三十六帝王蝸角
太紛紛

競說桑劉權算工棗祇任峻是英雄若論魏晉并吞業合數屯田
第一功

王朗遺書勸諸葛華歆避位推幼安無識鄙夫堪一哂鴟銜腐鼠
嚇鷁鷺

龍種由來自不常漢家卅六葉重光陳畱歸命甘朝晉那有西川
北地王

圖方高論準乾坤典午錢神勢最尊金谷園荒銅臭敗可憐三百
借黃門

典午銷兵事可憂一傳瓊毳滿中州何曾仰屋空私歎不勸君王
建遠謀

處堂燕雀日沈冥稽阮當年是獨醒忍見銅駝竄荆棘直須荷鍤
共劉伶

攀附爭夸佐命勳禪碑讓表太紛紜豈徒令僕人才眾更有廬山
九錫文

欲抵黃龍痛哭回金牌十二憾交催寄奴豈有班師詔徒使中原
父老哀

三十爲郎負此身元長才調本無倫桁前空負槌車壁鄧禹何嘗
解笑人

諸龍西京宮殿開金鈴寶珥照妝臺玉兒未起奄兒至特爲君王
解菜來

白馬南來尙講經百官戎服聽三乘如來不受梁皇帝捨與獼猴
作寺僧

宇宙將軍帝座居父兄已借賊刀除金陵一敗江陵再不悔操戈
悔讀書

不信唐虞桀紂分千金妝鏡萬金裙昔人豔說乘軒鶴鴈犬儀同
又郡君

楊柳青排汴水濱錦帆紅照廣陵春君王自愛江南好不奈長安
大有人

日落以下甲戌

日落水無塵湖天萬里春我來湘水上不見湘夫人瑤瑟訴芳芷

靈風吹白蘋微波皆可寄還問洛川神

湖上晚眺

青峰帶雨有餘翠落日墮江猶半紅一片晚霞人不見神鴉飛過
洞庭宮

金口夜泊

春色渡江殘江聲到枕寒劇憐今月朗不似故鄉看旅夢驚移棹
羈愁怯倚欄南飛有烏鵲拍拍起沙灘

漢口

浪湧山俱動舟移岸自行春風添草色夜雨走江聲赤壁幾龍戰
黃樓無鶴鳴不須吹玉笛恐起望鄉情

弔福處士

建安人網八絃聞更有平原一鶚來文舉薦賢翻殺友景升名士

不憐才家戶先爲諸君哭桴鼓難攻受禪臺莫向芳洲怨蘭蕙彈
琴中散更堪哀

京口

江草青含六代愁江山名勝自千秋如何刼換紅羊後又見仙人
十二樓

宋帝餘威此尙存揮刀百戰破孫恩祇今北府英雄在肯使樓船
據海門

金山

東坡玉帶風流盡南渡紅袍憾事畱我到寺門餘壞塔名山劫火
又千秋

沂州道中

落日蕭蕭照古臺塞原宿麥野花開天粘白草羣鷹沒風捲黃沙

言直卷一
萬馬來自昔山東聞出相祇今天下正需才淮徐千里紛多慨何
止思鄉首重回

望岱

日觀元壇夢有無側身東望總模糊奇才封禪兩司馬古木神靈
五大夫齊魯中分青氣合漢秦遺蹟白雲孤何當極頂攀鸞鶴會
借仙人玉杖扶

望月

憶從月滿別長沙又向中途見月華不識故園今夜月可知遊子
正思家

亦知西望長安樂無奈北來行路難十丈黃沙千里草何如花在
故園看

平原弔平原君

公子翩翩濁世賢俠游豪舉想當年未應九鼎忘毛遂合有千金
壽魯連趙士欲饒無美酒雍門來弔只荒烟於今肝胆何人識驅
馬登臺更向燕

北行道中書所見

亂後人家少兵閒堡砦閒至今多瓦礫誰與闢蒿萊擾攘中原劫
荒涼古將臺朔方元氣盡伏莽隱餘哀

水道俱湮塞年年旱潦憂石田遺地利膏澤望天流禱祀求梅雨
艱難恃麥秋更憐農器拙渾不似南州

渺矣龔黃傳茫然鄭白渠洫溝誰作志平準自成書歲歉追逋擾
民貧禮讓虛復陂兩黃鵠良牧意何如

自昔談經地儒風已渺茫空聞齊稷下無復魯靈光沂水稀絃誦
梁山有寇攘絃歌聲未遠化俗在循良

曠土茫無樹春城黯不花人行苦泥淖民樸廢桑麻輪角轟危石
馱鈴語白沙向來戎馬地荆棘滿千家

馬齒聲如雨車行勢若風地形雄趙北人語雜齊東草長天逾碧
塵高日不紅時聞牛鐸響交錯夕陽中

淖沱河

昔聞冰結處令我渡淖沱日黑塵頭落天青麥氣多客心驚大漠
春色斷長河漢帝英風在蕭蕭起白波

趙北口

陵谷千年幾變遷民貧俗敝尙如前晚唐藩鎮公稱霸盛宋君臣
竟棄燕塞內至今悲牧馬橋頭忍復聽啼鵲燕南趙北中央地舉
目山河倍黯然

離宮

寂寞離宮長綠蕪
暢春馳道塞明湖
石鯨鱗甲猶飛動
金爵觚棱尚有無
此日

乘輿空駐馬
昔年兵火怨啼烏
建章門戶多千萬
惆悵張華畫地

羽林

羽林神策荷瑤戈
戴鵲相望劍佩摩
漠北秋風偃鵬鶚
天南白日見黿鼉
籌邊苦誤牛思黯
度嶺猶懷馬伏波
感慨遼東貌虎士
曾隨旄鉞定關河

愍忠寺弔謝文節公

北朝豈解容巢許
已殺文山又疊山
死共墨胎爭大義
生看黃絹恐羞顏
沈淵尙憾龍髯後
齧雪寧思羝乳還
安得西臺竹如意
痛歌忠魄下雲間

懷欽招飲江亭

東華十丈塵冥冥眼底乃有西山青青山未肯入城郭城裏看山
得此亭亭子高高勢直上一望無端觸霞想風搖白葦秋颯颯幽
燕千里氣蒼莽盧龍之西太行東鳳城王氣何青葱雙闕峩峩若
天上夢魂不到蓬萊宮我生野性似麋鹿偶見山林輒開目九衢
車馬衣成縑欲藉烟雲滌塵俗王郎好客攜同遊坐中客數同瀛
洲左拍洪崖右浮邱舉杯綠帶山光幽亭外青山獨千古昔時遊
人骨已腐江家賓客安在哉興盡哀生各起舞落日澹澹西風來
浮雲蔽天生黃埃秋高草衰萬木落豈能鬱鬱居燕臺安得直走
西山向盤谷徑尋李愿披蒿萊兩崖壁立青天開

吳雲亭

趙然

約懷欽赴陝甘行營索詩贈別

茫茫我笑天無策才人落魄魄長安陌落魄長安分手行悽悽又憾

天無情憶初相識桃花井尹班陶陶夜深永至今清秋風雨聲猶
似昔年燈火影比來失意箋蟲魚虞卿窮愁空著書玉楮三年竟
何益鉛刀一割旋成虛文章憎命常相左芝焚蕙歎君與我此時
憐我復憐君劉鄩百計無一可君不能冬烘頭腦擁皋比盤中苜
藜甘如飴又不能摧眉折腰事權貴合五侯鯖作奇味吳生一笑
翩然來片言抵贈千瓊瑰玉關烽火尙未息侏儒索米胡爲哉君
聞此語心顏開側身西望燕昭臺我聞此語心惻惻滿天明月無
顏色平生壯志兩心知翻慙臨行畱不得涼風八月燕山秋蒼鷹
脫鞬太華遊病羽離韃獨雌伏坐談笑殺劉荊州方今

聖主重邊籌布衣祭酒多封侯萬里縱橫飛食肉今日墜歡何日
續西行東下兩茫茫樽前愁絕陽關曲

擬行路難十八首

奉君碧玉之琅玕不如仙人換骨之金丹防露桑間之艷曲不如
雍門墮淚之哀彈長天漠漠西風寒燈殘月落夜漫漫窮途百事
不稱意中夕起坐三長歎請君獵纓且安坐聽我高吟行路難

君不見落葉隨驚風飄飆各西東男兒志四方安能日坐環堵中
挂帆過洞庭采蘭香老天冥冥策蹇游燕趙擊筑歌殘風浩浩白
浪如山向人立黃蒿蔽日連雲表我身胡爲蹈此險云是西望長
安之古道五陵車馬來紛紛飛沙撲面令人老

車聲何班班驚言登泰山山形峩峩入雲閒登封輦道埋榛菅玉
檢金泥闕千載滿山木石皆冥頑袖中正有相如草漢皇不上封
中壇仙人鸞鳳望不極天都日觀不可以躋攀去去勿復言不如
歸來坐掩關

我欲泛溟渤乘風上蓬萊歸墟浩淼七萬里珠玕列種金銀臺奇

肱之車高崔嵬座中百寶千玫瑰鮫綃賣盡海田厓蜃樓橫空海
市開水仙踏波若平地冤禽銜石良可哀試問麻姑水清淺年年
變幻何如哉

君不見五城十二樓縹緲烟雲間治裝入海求神山樓船欲到風
引還白茅羽士從天來驗方棋門亦神哉尙主封侯震天下大言
長美眞仙才歲星沈沈有方朔饑臥長安米空索金門避世空詼
諧胡不早獻長生藥

千金市妖童百金宿名倡玉勒珊瑚鞭匆匆作急裝紫標黃標好
生活楞蒲一擲百萬強平頭奴子繡襦襦鞍馬僕從生輝光日暮
畱髡送客出美人更上萬年觴懷中刺字任漫滅不入五侯七貴
場君卿言語妙天下鯖魚飽死侯家堂

君不見漢家全盛時王侯大宅多光輝一旦銅駝竄荆棘豈憶華

轂如雲飛千秋獨有揚雲宅空宇寥寥人寂寂著書仰面看屋梁
覆瓿猶爲人愛惜煌煌京洛緇塵多嗚乎奈此素衣何

霸陵寂寞飛將軍下中李蔡成奇勳馮公白首郎署老七葉金張
珥貂早人生貴賤豈有定往往明珠暗投道隻身淹畱客他鄉不
如裹足不下堂侏儒日飽粟一囊何如庭闈壽一觴虎豹鬚鬚九
關臥安能排風叩天閭日暮途遠作何計舉頭四顧空蒼茫

時方好武臣好文不如投筆學從軍幽州苦寒日色薄回首不見
燕山雲陽關迢遙朔風烈沒髀惟見天山雪黃沙凍合旗影折白
草霜沈鼓聲咽斧冰作糜不得飽渴時但飲刀頭血相非虎頭擊
騎射不信眼中能有鐵玉門將軍不重士欲持縱橫向誰說早知
窮達自有命何事萬里馳驅輕訣別

有鳥有鳥名大鵬言將萬里圖南冥路長日暮六翮短背負青天

安得勝不見鸚鵡與鳩相將遊藩籬枋榆之搶亦大樂鵲鷦巢林在
一枝梧桐無花竹不實鳳皇蹠蹠垂羽翼胡不隨彼棲枳棘荆荆
千仞亦何益

老驥嗟伏櫪志在千里行朔吹響蕭蕭奮鬣空長鳴出逢驪驪鹽
車聲羊腸九折高崢嶸足僵力盡不得上隸圉鞭撻方交橫碣館
無人昭王死死骨誰知買千里坐飽棧豆亦大福局促轅駒安足
恥君不見天閑立仗料三品錦茵金勒日酣寢

登高望遠悲中來碧澗湧洞生黃埃我生之後乃多故倚柱夜嘯
誰相哀君不見賈生六大息梁生五噫歌文景明章稱盛治黃農
虞夏意云何秋高氣朗機槍作黑夜魑魅紛相攫威弧不弦身手
弱欲射天狼不能落海風震盪邊風寒仰視北斗光闌干

莫言太行高人心太行更崑崙莫言五嶽險方寸五嶽更偃蹇贈

君雙玉盤坐我七寶輦入門執手輒大噱爾時自謂交非淺一朝
反覆如浮雲五交三毀何紛紛到溉詎憶任助力王令更忌邱公
文安得獨立離人羣

君不見城邊草車馳馬奔難自保清霜一夜摧紅蘭北地先秋易
枯槁胡不移植安期山上承仙露下清泉靈根不死長蓊鬱琪花
玉蘂爭千年吁嗟轉蓬東與西叶卻羨野火燔中田

六龍之駕挽不畱昔日朱顏今白頭我我高岸變陵谷豈但華屋
成山邱天上難寄愁地下難埋憂欲尋崑崙見王母安得造父馳
騅驪不如俯仰隨虛舟飄然且作逍遙游

我知行路難不行將奈何陸行畏虎兕水行畏蛟鼉虎兕蛟鼉猶
尚可人乏馬饑愁殺我涼秋八月風蕭瑟夜吹魂夢還鄉國白雲
迢迢限南北欲歸不能意彌惻燕薊早寒天蒼涼黑貂裘敝無顏

色豈惟裴敞無顏色高堂倚闥雙鬢白

孤雁唳月啼墮急對此茫茫百感集人生歲月若驚電爲樂無時
憂已及有客向我笑問我何悒悒升沈得失詎有定何不飲酒曰
鼓瑟我謂君言亦復佳感君七發起我疾憂患皆從識字始自悔
雕蟲困佔畢明朝與君射獵終南山身披黃衫著袴褶

興勝寺中秋同懷欽雲亭對月作

涼風驅雲雲不流千樹萬樹聲颼颼須臾雲開明月出霜天皎潔
當中秋去年中秋病中臥今年中秋客中過不死猶能意氣豪窮
途更覺乾坤大乾坤浩蕩吾徒來王生吳生皆異才良宵作客易
惆悵且談風月傾金杯把酒問天天不語瓊樓玉宇知何處仰視
明河不可親蕭蕭木葉聲如雨請君進酒君莫哀西風華髮將人
催寂寞金臺一坏土何如且築糟邱臺不須望月嗟羈客辜負杯

中星影白試看天邊一輪月吐出山雲照宮闕不須對月懷家人
他日還家更念君月有陰晴與圓缺人生安得無離羣興酣起舞
獨無數寒蛩切切啼秋露露深秋冷月西斜酒醒夢回君已去
南歸畱別懷欽

世事茫茫那可測我今歸南君在北前時君擬作西遊我已南歸
君尚畱或去或畱同一別聊共歌吟度旬月幾年歡笑猶眼前一
夜離腸更愁結金門萬言不見收玉門萬里難封侯紛紛人海有
吾輩失意一蹶如浮漚同學少年方鼎貴五陵春風忽秋氣我歸
不爲萼鱗香君畱豈戀侯鯖味薊門明月燕山雲我憶京華復憶
君小隱林數大朝市同心豈必常同羣塊然獨處誰相問別後干
秋須感奮但期傾蓋到白頭莫更悲歌減青鬢海風蕩蕩橫天來
車塵吹散黃金臺別君且歸伏草莽求仙何意尋蓬萊攜琴將作

水仙操鍾期已遠無同調風雲聚會倘有期更向長安作西笑

海舟中作

一葦渡重溟雙輪駛不停濤奔兩山立龍過滿船腥日到波心黑
天連海氣青那堪夜風起空際雨冥冥

滬上寄懷欽

不見故人王季友海天回首道漫漫每懷夜雨聯牀久太息秋風
行路難幾輩隨變夸羽獵一朝驅馬出長安布帆無恙江湖濶滬
濱潮聲日夜寒

松江舟中

露氣連空白江沙照夜虛海邊聞斷鴈吳下見鱸魚紅葉霜天後
青山戰血餘澄清昔年事臨眺更踟躕

六代繁華地於今半寂寥山川餘霸氣金粉誤前朝木帶焚餘綠

江流劫後潮不眠聞戍鼓蘆荻益蕭蕭

杭州

錢唐鳳舞龍飛地潮打空城日夜來千里春光自花柳十年兵火
尚蒿萊濤頭白馬沈忠骨湖裏金牛出劫灰曾是

翠華行幸處五雲猶護大觀臺

西湖歌

西泠橋畔西湖頭青山歌舞無時休此日摩挲歎銅狄當年名勝
說金牛勝地關從唐宋日白傅蘇公今廟食葑田一捲蒼煙空柳
岸中開明月出鳳林月色年年秋曾照南朝天子遊半閒門蟀朝
廷小一聲白鴈海天愁賸水殘山朝運改煙霞黯淡逾千載曾聞
鳳舞到錢唐又見

翠華巡越海

先皇屢駕六龍來內外

行宮次第開九曜山蟠龍虎氣萬松嶺起鳳皇臺百年休養承平
久甲第名園間桃柳處士亭邊放鶴來公卿湖上騎驢走金谷修
成不計錢風流觴詠太平年機雲兄弟工詞翰王謝家郎愛管絃
裙腰芳草堤邊路畫舫觥船朝復暮尋香時到慕才亭酌酒還登
小青墓處處紅樓簫管聲盈盈翠袖踏歌行六橋金轂牽情易十
里珠簾照眼明樓臺倒影香塵鎖脂粉咽波波淡沱直將錦繡裹
湖山不信繁華有兵火鴝鵒夜叫海風涼十萬黃巾下建康天目
真人鳴鐵弩羅平妖鳥踞金牀岳王墳前催戰鼓錢王祠下馳豺
虎礮火朝轟古帝城殘兵夜走通侯府從此干戈遍浙東西湖亦
在戰場中波光明照霜刀白潮水渾流血浪紅空城鬼哭黃昏月
玉碎花摧慘無色美人末路逐鴟夷公子窮途哀寶玦漪園秀野

長蓬根葛嶺梁莊不復存夜月烏啼聖因寺秋風人散湧金門烟
莎一碧無花木現出明湖真面目山頭古佛坐無龕笑看興衰如
轉轂湖上笙歌賸曉鷺湖中燈火只流螢紅花寂寞
宮牆地白草蒼涼

御筆亭

聖主中興耀神武指麾王式平裴甫文物衣冠又一時亭臺金碧
成千古十載西湖夢想中今來仿佛畫圖空荷花桂子俱零落悵
悵吳山第一峰

岳忠武墓

南枝不向北大樹氣蕭蕭遺憾朱仙鎮沈冤白馬潮風波哀大獄
王氣歇南朝寂寞冬青下無人麥飯澆
抗詔臣何敢班師眾不留金牌悲萬古鐵像亦千秋奸相藏刀待

將軍賜劍休應憐刺客手難斷橐街頭

宋室黃袍後由來忌戰功貽謀至臣構懷慝類湘東不灑攀龍淚
先藏射鳥弓煌煌壁上詔豈不識英雄

錦繡西湖地君王誤此閒至今埋碧血餘憤撼青山擾攘龍猶戰
淒涼鶴不還棲霞兵火後憑弔有餘潛

西湖雜詩

落日滿雷峯寒鴉自來去回首問前朝惟聞塔鈴語
湖水一亭碧荷花十里紅獨憐搖落後迴立泣秋風
鳳嶺空衰草南朝宮殿荒一般興廢感寥落故紅牆
白蘇去千年西湖久無主萬柳搖秋風雙鳬下烟渚
夜靜波平岸天高月印潭故鄉秋色好還憶洞庭南
花柳已摧殘湖山尙清美不見吹簫人零落六橋水

霸業今何在豐碑草又荒空山一祠宇故老說錢王
鬼斧闢陰崖神光流寶暈何時靈鷲飛難呼白猿問
孤山萬梅花遺香猶旖旎莫教妒婦津流入西湖水
南國香銷盡西湖柳不青至今蘇小墓猶說慕才亭

渡江南歸輪舟中作

長江萬里秋風涼青山兩岸爭低昂當時但說南人船不知乃有
西洋航西洋使船勝使馬雙輪激江如沸湯蛟龍遁逃城郭動飛
鳥不敢依帆檣朝辭滬上暮京口金陵隱隱浮燈光黃天蕩前潮
半落采石磯口風微颺金焦兩點明如眼慣閱千古觀興亡吾聞
天塹限南北天將兩戒分紀疆前爲三國後六代虜馬難恃投鞭
強南宋奄奄困殘局小朝廷亦安偏方桂林妖寇詎足道負嵎江
左猶鳴張逋誅十載甲兵敝至今戰血悲康郎鍾山龍盤王氣盡

竊據尙足容猖狂誰遣螺舟入中國蹴踏巨浸田成桑樓臺處處
開海市一衣帶水誰能防我乘颿輪復飛渡江流洶湧驚愁腸作
歌對月發深慨北斗墮地天茫茫

恭擬

穆宗毅皇帝挽詞

紫極傳

哀詔蒼梧哭

聖皇海邊金甲洗天上玉衣涼犯座星爲崇沆淵日不光暢春園
寂寞無復

翠華揚

繼述同周誦英明似漢昭修宮前罷議

親政日

臨朝鶴髮臣猶在貂璫氣不驕金甌重復舊無愧對神堯

七葉神孫接於今孰繼承鳳圖宗派選

龍馭鼎湖昇舊歲觀新政人心望中興前星尙虛位何遽掩

山陵

待詔長安久逢時愧不才祇今居草莽流涕向蒿萊玉几憑何日

金門閉莫開道揚傳末命回首五陵哀

壽星觀弔王文成公

以下乙亥

長沙古道秋草生石壇漠漠驚秋聲前賢故址半蕪沒風吹林木
寒鴉鳴正德之際那可道赭袍將軍淫賞刑薰膏柄國正氣喪牢
戶往往填公卿先生叩關上疏救亦下詔獄嬰鼓榜杖責不死有
神護一官萬里龍場行颶風飄舟落滄海仙人笑送湘纍迎江頭
夜泊感遷謫至今題詠畱潭城蜈蚣坡前萬峰頂鳥言夷面聲咿

嚶窮山默坐發神悟
直接鄒嶧眺朱程
乃知動忍關大任
心學幻出胸中兵
洌頭藤峽小豎耳
鄱陽一戰奸藩平
大才槃槃用未極
青蠅白璧何營營
功高叢忌古所慨
況兼講學羣愚驚
蚍蜉撼樹自今古
蜀犬吠日猶紛爭
更埽荒祠訪遺蹟
落葉無數蒼苔橫

送王吉來

代功歸衡山

我夢衡山好芙蓉
七十二峯晨霜石
路屐夜月寺門鐘
李相今何在殘僧
儻再逢君歸更吟
眺煙雨滿長松

江上雨

雨勢霽江天
開一鏡圓漁燈紅
對岸蘆絮白和煙
臨水傷容鬢浮家
老歲年登舟無月
望高詠獨租船

靖港

藥師舊日屯兵地
雲母溪邊古港存
此日秋風驚戰鼓
當年故壘

膽空村蒼蒼葭蒺神猶王寂寂蛟龍浪自渾指點曾公覆師處銅
官嗚咽不堪論

岳州

風煙萬里接清秋星漢千尋近古樓楚地分餘仍重鎮湖天盡處
是雄州仙人吹笛音何渺野老憑軒涕更流楊太雙輪久灰滅不
堪重問宛渠舟

螺山

螺山夕日落魚市晚風腥去鳥衝煙白陰崖入夜青常懷竹林契
有愧草堂靈漁父滄浪水茫茫感獨醒

魯山

天塹由來未可憑魯山形勢尙峻嶒蛟龍有日興元德豚犬無人
惜景升王氣銷沈三鼎足霸圖牢落一漁燈大江淘盡英雄去鐵

板蕢殘感慨增

江行曉發

欹枕聞水聲冷冷似鳴玉柔櫓搖殘夢舟中睡新足朝霞耀口紅
秋樹帶江綠心隨大川遠思逐飛鴻速曠懷誰與宣塵憂感所觸
廊廟與江湖何時謝羈束

過金陵

月明采石高風急寒湖長微茫辨池隍蕭瑟聽荻蔣世殊城郭舊
運盡英雄往古燹旣崢嶸荒榛復泱泱寶氣歇黃陵蕪城見頽壤
疏燈耿陰燐古樹羅兵仗蒼黃元武戰寂寞莫愁漿鳳皇有空臺
玉女餘虛幌中原昔睢刺此地棲夔魍橫江走滕臙臺城聚兵饌
匡時賴賢相奮臂爭應響苟非貫金石曷以傳圖像浩歌哀江南
臨風徒慨慷

道中晚行作

眾鳥各投林孤雲亦歸山無情與有知意倦皆來還昔余隱城市
日暮閉元關抗懷在清淨紛念忘塵寰胡爲嬰世網一去渺不閒
竹柏絕古懽埃壘多俗顏凌晨促征駕入暝車班班俛仰追昔娛
超遙不可攀猶思戒磨涅豈敢避險艱緬懷古聖人道可居夷蠻
野望書感

山川勢鬱盤昏旦氣陰翳煙雲自往還景象各開閉大星珠斗映
殘月金樞麗仰眺即可忻旁望渾無際曰余走風塵懷憂亘年歲
謀身亮非宜排世亦何濟緬懷昔賢達夙志在松桂豈其愧山靈
遂乃焚芟製大道無虧盈俗情有興替終逃畏壘鄉吾生倘可衛
晚泊洲上

葭莢映蕭寥菰蒲汎清淺青莎閒白石紛披迭隱顯日落乘微涼

凝眸曠遐緬夜色明澄江秋陰暮蒼巘層林霞外出一鳥煙中辨
徒懷涉江意芙蓉未可搴旅情方鬱陶暮景足遊衍空濛愜幽懷
萬念庶以遣

師伏堂詩草卷二

善化皮錫瑞鹿門

悼亡 以下丙子

嚴霜淒厲隕芳蘭
泉下誰憐玉骨寒
試傍紅窗數苔迹
香塵猶在曲欄干

擁髻燈前伴苦吟
金鑪香燼夜停針
春風鬢影今安在
落月空房不可尋

擣藥牀前眉黛愁
昔年臥病茂陵秋
長卿無恙文君死
更與何人共白頭

楊柳樓高陌草薰
手揮珠淚泣羅裙
陸郎他日斑騅去
忍向空幃別細君

西窗剪燭話歸遲
萬里還家一笑時
今日重來武林道
滿天紅雨

言青卷二
一
葬西施

燈下親教長憶歌人閒天上憾如何而今瓦冷鴛鴦夜憾比淋鈴曲更多

打槩西風黃葉天君山如黛小姑妍晚妝照水雙蛾綠同倚蓬窗看鷺眠

數千里外到杭州未向西湖共泛舟今日湖邊春色好六橋花柳定魂遊

漏盡寒宵喘欲沈苦拋鴛枕倚香衾祇今夢醒驚魂在猶似空牀聽病吟

珠汗沾衣付火烘彌留猶是望薰籠從今黃竹箱長鎖怕見當時廣袖紅

魂返青山萬疊遮殯宮何日返長沙昔來攜手今攜骨忍見初開

陌上花

靈隱寺

嵌空何玲瓏列嶂獨深秀精靈聚罅穴翠氣隱巖竇壺盛九華石
水穿泰山溜巨靈仙掌開西域鬼工鏤鑿成蜂房奇雕出螻山瘳
陰洞忽生白一線覺天漏慧光誠芒目眩或殊觀誰能呼兩猿
證彼飛靈鷲

錢王祠

錢唐門外江湯湯我來不見吳越王天目龍飛氣蕭索春風吹冷
千垂楊廣明之末那可道屠沽惡少皆龍驤奮挺一呼巨寇走不
容兔子棲金牀開門節度唐所賜胡不討賊甘臣梁不作東帝奉
正朔時復僭號何心腸齊侯似鼠工夜竊仲謀貢鳥非雄強用奢
幣重國最爾豈免果榮苛農商浙西重稅此作俑有何功德須蒸

管宋室表忠本過厚廬陵直筆甯荒唐斷碑苔塵鏡石掩惟有陌上花猶香欲訪故宮問遺址荒陵落日來牛羊

題受禪碑搨本

炎漢之季何披猖阿瞞自比周文王歌吹猶聞奏漳水禪文已見來許昌龍頭太尉老不死豐碑列名光齒齒面縛選曹隸法工大書深刻方磨礪翰墨未乾覆宗社天大討曹牛繼馬空餘片石闕興亡不似飄零銅雀瓦衣冠優孟殊堪嗤自謂舜禹吾知之居堯之宮逼堯子英皇釐降諒闇時六代中原幾龍戰誰是征誅誰是禪亡新僂敗魏僂成興衰屢向碑中見冷齒空聞笑褚淵石頭孰解衰衰粲尊號紛紛幾革除崇竦稱莽竟何如繁陽受禪文雖古不似隆中正議書

至餘姚

四明霞色晚姚江雲氣昏
迢迢指滄海飄泊任乾坤
落日羣鳧浴來潮萬馬奔
已憐驚遠目况復撼征魂

過成山

對此茫茫我亦愁成山一髮是滄洲
飛行弱水三千界搖蕩仙人十二樓
棧客猶思通碧漢牛車何意避橫流
桑田恐變須臾事萬里圖南苦未休

通州

微風淺水下扁舟
遠樹明霞天盡頭
兩岸稷苗青不斷
亂蟬聲裏過通州

移居內城柬黃杭蓀吏部

濂之

我從總角交公瑾君自長安識子昂
歲月十年驚老大風塵萬里各蒼黃
雲間雅集東西屋湖海豪情上下牀
遙夜相思渺河漢隔

城鐘冷五更霜

出都見秋柳

裊裊都門楊柳枝春來曾見嬾輕絲分明一樣黃金縷不是當初
踈地時

露眼長街慘碧潭秋風吹墮綠氍毹青門無限傷心色何必依依
歎漢南

夢醒靈和路已遙風流非復舊長條春風已過秋娘老更與何人
關舞腰

三疊陽關易慘魂永豐無路植靈根不如歸種江南好一任秋風
冷白門

賀監宅

四明狂客晚學元夢遊帝所聽鈞天覺來御風欲扁鵲解組入道

求歸用剡川一曲詔書賜元宗御筆題詩篇黃冠故鄉或有意青
門祖道爭稱賢天寶之初積薪伏相臣楊李方弄權銅駝荆棘兆
已見奄忽十載皇輿遷先生歸去方醉眠酒酣騎馬如乘船醒來
洗眼鏡湖水絕勝曲江宮殿前予生苦晚慕執鞭但見故宅埋荒
煙珠樹鶴飛少眞訣愛才誰解邀青蓮醉解金龜呼謫仙握手一
笑三千年

窆石亭歌

四千年前一卷石天荒地老無人識崢嶸似出神工鑿黯淡猶存
太古色潒水滔天黃屋憂山傾石裂蒼穹愁黃熊成敗兩父子乃
勞天帝錫九疇豈徒錫疇擅神術玉書金簡茲山出淮水鐵鎖因
支祈瑤英神戈授童律龍門一鑿天爲開積石碣石雙崔嵬功成
會計何壯哉諸侯玉帛如山排豈其萬歲魂魄樂遺弓遠葬橋山

哀鏡山爲陵石爲穴畱鎮乾坤一圓碣雨淋苔蝕閱千秋欲問興
亡不可說寥寥曾經象鳥耘斑斕尙帶蛟龍血南北兩山相對蹲
萬古不化龕山魂化熊化石皆神人宜生敬承賢子孫墮山猶見
防風骨神明之胄傳於越陵宮有神石不泐鍊之可補媧皇缺吁
嗟乎自從地缺東南頭六鼇震盪大九州願持此石作息壤永鎮
滄海無橫流

題七星巖

七星光芒芒何時化爲石魁杓忽倒覆了不見天日鬼斧開陰崖
靈根插大澤仰愁日車翻俛恐坤軸阨長劍倚太空峭壁立千尺
翼翼雀張屏戕戕人戴幘側若剖大甕稍進更廣斥陰森見神宮
壯麗羅帝釋賓坐宜清談僧厨間香積澄冽百丈潭疑有蛟龍宅
中多放生魚遊泳各有適水光綠鬚眉石氣青几席將無五丁鑿

或恐巨靈擘僧言洞府奇亦屬人力闢鏡山破嶙峋鎮海拒潮汐
入險鑿愈深鎚幽罅遂圻長城蒙將軍不顧傷地脈腰絙下崖洞
性命甘一擲從此混沌開得覩奇勝迹兩崖多題名鐫字雜青赤
雖非洞天妙已覺人境隔中流一迴首峭削蕩心魄

登紹興城中塔

浮屠跨中天變幻納眾態仰視不容趾直進乃無礙益上轉羊角
孤高出鳥背曠野多青蒼翠山半金黛勢偏枕孤城力重壓大塊
溟濛江海氣臺殿幾興廢撫時傷犬羊往事弔鳥喙江山自爭雄
鋒銳竟安在烈風休無時憑高起百嘅興倦飛禽還殘陽半明昧
遊快閣 閣爲陸放翁遺蹟

鏡湖綠水春差差一舟泛漾乘風滿間叩名園看修竹主人不在
園容窺春光半上青柳色日氣乍合紅桃枝樓臺小構亦奇勝金

碧倒影光入池客言此園卽快閣放翁晚闢曾題詞有宋南遷困
殘局湖山花柳爭游嬉先生感事獨悲慨臨終北伐呼王師南園
一記晚節墮後儒引繩多詆訾師王仇金志恢復猶勝秦史徒夸
毗鴻文假借或有意春秋書敗榮乾時梁州從軍氣吞虜破賊身
手空哦詩東海求死苦不得南山射獵嗟吾衰歸隱會稽豈素志
徜徉山水同羲之我來快閣公已往輪囷肝膽何人知出門回首
有餘慨片帆習習東風吹

過桐廬

以下丁丑

到此疑無岸扁舟更向西帆開半江遠天入萬山低水靜游魚現
林深怪鳥啼桐君何處去百尺是丹梯

嚴州二首

峽束亂流門激湍相吐吞渦旋兩岸急濤捲眾山奔上瀨爭人力

歸舟撼客魂荒林聞夜語燈火出前村

急水撞巖瀨亂山過客舟瀑飛千尺落帆轉萬峰流積氣昏無定
浮煙漫不休清時但孤隱誰復問羊裘

富春郭用康樂韻

羈心逐奔流舉目見高郭湍聲撼澎湃日氣蕩迴薄急瀨流無滯
連山勢相錯逝水嗟馳年藏舟駭大壑迢遙千里路孤蓬將安託
備嘗旅客辛薄植微生弱江海多驚魂田園負夙諾臨流感茫茫
撫己空落落願隨忘機鷗毋羨求伸蠖

七里瀨用康樂韻

江雲逐行舟空水澄遠眺巖高亂流束湍急羣峰峭鏗鞳驚夜響
陰森隱晨曜不見游魚影時聞春鳥嘯陵幽豁襟冲蘊真愜道妙
人生貴孤高秉志遺眾誚羣龍滿朝廷一星老漁釣緬焉思古人

獨往豈殊調

嚴先生祠

箕穎仰巢許大梁念夷門伊人渺千載餘韻今猶存炎精昔中厄
羣佞懷私恩蔣徑迹將斷漢廷書何繁先生一羊裘大澤獨鴻鵠
不爲故人起甯同殷士奔荒祠撥蒼蘚寒泉薦芳蓀客星已天上
遺像猶春溫峩峩千仞臺下有南溟鯢黃龍閤位絕白水真人尊
清波蕩渾濁逸氣開冥昏敬寫高山風庶使薄俗敦

西臺弔謝皋羽

悲臺蕭瑟江水黑淒風捲水碎蒼石遺民之淚孤臣血化作富春
江百尺文山抗節宋社屋東南半壁皆歸北世無一片乾淨土窮
逢慟哭何由得嚴灘西望臺峩峩狂奴歸去曾婆娑飄然晞髮來
陽阿約客招魂歌楚歌荒祠敗甃今千載披裘釣澤人安在赤符

天子漢中興塊肉龍裳偏蹈海崖山傾覆燕山哀空山酹酒悲風
來山高水長足一慟吳臺越臺何爲哉天子客丞相客兩朝成敗
何懸隔高人笑觀黃龍死義士哭招朱鳥魄名垂漢宋各千秋食
配方干坐兩頭當年灑淚江中水不遣長江向北流

宣平雜詩

小邑曾無郭窮鄉別有天山連兩越盡地入八閩偏僻左嗟羈泊
荒涼閱歲年趨庭比東郡臨眺總茫然

異族兼榮瓠居民本駱漚百年沾

聖化萬里徧山陬古蹟清修寺仙源赤石樓謝公蠟屐在何處足
勾畱

邑少披裘客冠裳亦未多曾無款段馬不著武靈鞞餓隸倦持檄
羸兵行荷戈甌閩近咫尺滄海幸無波

粵寇通誅日環山于女號頽垣自烽燹敗屋尙蓬蒿石洞遺黎避
金城保障高毋徒恃僻陋弓矢未全棄

毒霧漫天黑驚沙照夜黃瘴煙沈野色日氣奪山光旅客戒晨起
居民多疥瘡長沙苦卑溼感此益茫茫

入夏常愁冷方冬更覺炎葛裘終日換寒熱四時兼漢將偏逢瘡
齊侯易病瘡盈車載薏苡於此定無嫌

僻地無車馬游蜂日放衙堂空上雞犬墀雨走魚蛙客坐生青草
公庭落晚花齋中讀書好寂寞似山家

園比蘭成小蕉桐一兩枝雪消千嶂出春到萬山遲古木陰迷幌
迴欄影入池牆頭峰數點相對碧參差

落日懸高樹歸雲補斷山梟鳴過窗外猿嘯出林間破屋春多漏
重門夜不關靜思身世拙吟望且蕭閒

聞晉豫荒有感以下戊寅

玉山種禾禾不秋商山采芝芝難求明君貴穀賤金玉嗜好詎異
誠遠謀布縷粟米古征歛朱提作賦誰爲籌金生粟死穡事賤乃
棄水利荒田疇民鮮蓋藏廩無粟饑饉薦至惟填溝金銀滿把不
可食黃蒿白骨無人收桑林自責黃屋倣圭璧既卒蒼天愁安得
倉頡制字天雨粟不然傾山滂沱雨亦足監門有圖向誰讀天地
無情野老哭

曾生友顏

貽芝一本作歌謝之

君不見商山四皓頭鬢白紫芝英英滿山澤仙根采得當晨餐八
十長畱好顏色又不見祥符天子慶東封羣臣獻瑞爭相從芝草
盈車數千本深山無處潛靈蹤天生神物自有意顯晦一時何足
異毓秀甯知俗目驚懷珍豈顧庸夫棄曾生讀書雙樹園文采鬱

積成靈根連蹇一本遠持贈彷彿照耀齋房門神光夜恐鬼物奪
古色疑有蛟龍蹲我欲相從掇仙草爲駐朱顏長不老他日青天
騎白龍耕煙更上蓬萊島

夏日偶題

驚電無餘光逝波不反顧傾暉苦奔馳明日已非故朱曦忽乘權
青陽乃改步耳警鷓鴣鳴目傷陽烏驚飛絮半墮茵委英早離樹
繁華今安在密葉森已布空驚蕙草陳竊悲蘅芳暮萬化方倏遷
韶顏豈更駐蓬心弗趨營元髮嗟已素毋使靈根銷長爲宴安誤
寄懷欽六章

豐城有雙劍燿若青芙蓉朝騰虎氣白夜照牛斗紅寶匣埋古獄
神光薄蒼穹沈淪詎足傷氣象固不同中道忽分飛千里判雌雄
閩江起雌霓楚水冠雄虹遙空鬱相望奇采兩熊乘時待一割

無由吐英鋒，睽離豈必慨。神物終當逢，何日延平合。青天交兩龍，
弱齡負志節。矯首望乾坤，攀嵇慕鳳舉。御李企龍門，同懷得吾子。
相合如觥塤，心胸拓萬古。議論開重昏，奇篇照古色。豪氣驚湘魂，
方秋感瑤草。當春擷芳蓀，各負圖南翼。變化擬鵬鯢，荆玉已三刖。
天門猶九闢，落羽同驚弦。轉蓬並離根，握手長安道。悲心安可論，
悲心方長安。分軌已燕越，蒼茫乘天風。慘淡拾海月，南朝宮寢荒。
西湖歌舞歇，頽壤感蕪城。黃蒿間野蕨，側聞方東游。車服觀魯闕，
雕龍稷下談。筆虎泰山碣，妙景兩莫偕。清吟每孤發，感物輒增慨。
傷離益驚骨，君歸已資江。我行復溟渤，相避同燕勞。相從匪蛩歷，
相從日渺渺。相望徒茫茫，閩山錦思積。越嶠瑤情長，日暮登高望。
但覩南鴻翔，碧草含翠煙。丹英鑠紅光，亭亭孤雲起。其下爲清湘，
寸心日千里。明月阻關梁，常恐鵲鳩鳴。彫彫殘蘅杜，芳靈空墮瑤水。

若采委珠霜嬋娟感遲暮何由醉瓊漿美人不可見仰首空沾裳
沾裳難爲心伏枕乃成夢江水路易迷楓林魂誰送覩顏慙新歡
感舊驚昔痛舉酒君歌呼論文我吟諷離羣少規言勵志益增重
相期貴平生毋爲狎庸眾北方多啼號漆室感雰雰深淵有蛟龍
栖枳幾鸞鳳蕭條三秋意感慨當世用剪燭方高談晨鵲忽驚啼
晨興報乾鵲及暮來雙魚開緘忽歡躍果在故人書清辭振金玉
高誼佩瓊琚款曲若親訴回環渺愁予樓頭仲宣歎廡下伯鸞居
龍蛇自有時歲月忽嗟吁嬋娟秋風起湘水落芙蓉元髮易改素
白日不躊躇故山有芝草南望賦歸與養真待傾蓋攜手倘虛徐
夜坐

獨坐趁涼夕萬山昏暝天陰蟲入夜急老樹得秋先爲客幾千里
踰夢多歲年流螢太無賴故故傍牆邊

新秋池上

金素變炎風，玉霜警元髮。渺然清秋夜，涼氣森已發。澄潭影疏桐，曲檻延孤月。流螢度水飛，宿鳥依林歇。暮山轉蒼翠，歸雲半出沒。白露明寒蕪，黃葉墮清樾。風景疑鄉園，迴望乃超忽。信美何足留，淒風况驚骨。

夜話有感呈楊霖生

煥彬

萬感集黃昏，非君孰與論。壯心懸日月，噫氣塞乾坤。大道無今古，匡時有夢魂。著鞭誰先我，雞唱警劉琨。

落日亂峰陰，蒼茫天地心。文身棄章甫，鳥喙怪鳴琴。薄俗稀同調，遐荒孰賞音。因君話夙昔，長劍夜龍吟。

中秋日次韻答霖生

枯蒼山萬里，隔斷古今愁。明月幾時有，長江無盡流。嬋娟誰共望，

言言卷二
晴雨故爭秋便擬乘風去高寒天上樓

木落洞庭波芷蘭風露多登高望鄉國舉目見山河有酒且當飲
感時將奈何一杯更相屬擊節聽君歌

秋懷

芳歲忽以晏秋氣薄重山栖栖羈客子覽鏡嗟容顏中夜萬感集
煩慮焉能刪吾生乃有涯世路誠多艱嗷嗷負霜鴈高舉出塵寰
我欲憑雙翼雲飛不可攀

十歲調羣籍二十遊皇州遂覽古今略頗識安危籌不逐城東兒
門雞稱俠遊仰面看屋梁汲汲無時休坐談復何益頽陽倏西流
臧穀一亡羊誰知劣與優

驅車至幽州北首望燕臺黃金高崔嵬賢人安在哉望諸墓已拱
郭隗甯重來運會自有時風雲爲誰開秋風驅萬馬擾擾皆驚駘

嗟彼按圖索世豈無真才

中坐眺山川山川盈目前關河昔慘黷匡扶賴名賢大呼激眾志
獨力挽虞淵玉弩銷饑鏹金甌更完全威名婦孺識元功竹帛宣
炫赫自一時本計仍茫然憑高望中原千里莽無煙元氣尙未復
植基詎云堅天地固多憾賴人補其偏幹運力已窮遺黎誰與憐
巖巖勢千仞壯麗爲明堂審曲自班爾月朔朝侯王纖兒從何來
昧然縱斧斨飄搖復風雨敝漏多冰霜恬嬉者誰子燕雀紛翱翔
方將塗丹艘未遽急棟梁何以支傾危城邊多白楊豈無青松枝
鬱鬱沈高岡

遙遙望千秋千秋亦可喟黃農忽焉沒何者非晚季文景與明章
當時已稱治君臣盡明良生民不憔悴匪無成法遵亦重擇人寄
下詔求英賢上書取高位思古發幽情後時苦不遂誰與宏漢京

已矣嗟盛事

世言樂久視久視亦何欣
蜉蝣寄天壤世故胡紛紛
滄桑變須臾運會日泯
勢去者吾未見來者吾不聞
何如求要訣餐霞躡飛雲
高步崑崙邱俯首視塵氛
乾坤血元黃宇宙幾合分
大笑蠻觸輩究竟將何云

清宵不能寐明月照我牀
白日去昭昭悠悠夜何長
肅殺兆已見盛陰薄衰陽
君子貴識微豈不在履霜
何待雨雪零天風已枯桑
秋高萬物肅天地何清幽
西南有聲來蕭颯感人憂
金石日雕鐫逝水方東流
胡爲一念間心形自相仇
植基在廣漠與世遊虛舟
山中有桂樹但去無遲留

獨立天地間誰與其陳說
蓬心苦未化用大亦已拙
章甫制異時况乃適諸越
誰爲呼好冠方自矜斷髮
空山多悲風四顧益超忽

白雲何遙遙鑒之以前哲

送楊霖生歸湖南

異地同爲客登山况送歸遙憐慈母線豫飾老萊衣思比鱸魚切
心爭鴻鴈飛還家君先我攜手意多違

春懷

以下已卯

南山有喬木黃鳥巢其巔春風感物心嚶鳴各爭先歌聲叶宮徵
唱和若鳴絃感此求友聲慨彼伐木篇山林苦離索百里乃無賢
足音絕空谷踽踽獨誰憐

紅桃華灼灼乃在幽崖間弱柳何青青相映色斑斕窮冬歷冰雪
生意良已艱幸逢春風來喧氣回空山含芳尙未發風雨激餘寒
嚴霜封其條枝葉更摧殘摧殘諒不畏所嗟芳歲闌

故鄉在何所乃在湘江湄沿流望北渚連山接九疑乘鷺耿中正

將就舜陳辭蒼梧未云遠浮雲乃蔽之渺渺飛霞佩下女安可貽
徒見迴風起繽紛載雲旗

江南曠千里目極傷春心哀此水湛湛耽樂忽強鄰丹陽始封地
一戰覆全軍根本棄不顧遂蕪兩東門孤臣痛哀郢孱嗣忘報秦
青兕方夜獵黃雀堪悲辛嗟哉五千里乃以役仇人

昔有避世士乃在金馬門龍蛇守吾分夷惠匪吾真山林豈不美
顯晦固殊倫大隱亦虛語世網已嬰身苟非逃空虛曷以離垢塵
山中春草綠吾欲招王孫

大道似不肖窮通非豫期富貴如浮雲焉用日紛馳早學屠龍技
壯悔雕蟲辭佩劍過相笑鉛刀安所施身前尙不察萬世更焉知
良圖空夢想毋乃迷非時

題畫

曉露香凝豔影寒異鄉春盡怯憑欄夢中彩筆無人識愁向邊鸞
畫裏看

墨池搖曳楚江荷娟娟西風澹澹波手把芙蓉望天末洞庭深處
晚涼多

栗里秋高三徑荒畫圖空見落英黃故園千里不歸去風露滿天
湘水長

誰向江南寄一枝暗香疎影暈相思綺窗春色君知否惆悵畫圖
楊補之

寄懷欽

空山引羈緒獨處感憂端異地鶯花老暮春風雨寒故人千里隔
歸鴈一書難莫倚停雲曲遙遙天際看

野望

一徑入巖腹青蕪接紫氛亂山斜抱日遠水暗生雲蕭索古今意
微茫天地分離情與飛絮飄落共紛紛

山行

山行雜風雨旅思亦蕭蕭古寺峰爲壁荒村木作橋壯遊輕海國
歸計念耕樵深愧巢由意良時乃避堯

宣平至金華道中作

初陽炤前山山行積清景遠水鏡千崖澄潭圖萬影披雲始登峰
踏霧乃下嶺老樹如虬龍蟠空攫人頂仰望似無路遠步不獲騁
幽徑方數轉顯豁乃殊境綠疇正鱗次碧稻已盈頃村農爭荷鋤
耦耕意方靜筋力豈不勞衡茅遂幽屏狂馳復何爲寸心彌耿耿
鴟鷺哮虎鳴猿作小兒欬山禽多異聲野卉有奇態亂峰不知名
列仗儼相對來青迷後先轉綠失向背赤土霞色明落日石光碎

人行戴危磴仰視恐其墜平生好崖壑此地非所愛仙源在何方
遙望有深慨

嚴州

客心爭去鳥雙眼望遙天碧草多迷岸青山亂入船孤城寒背日
一棹晚衝煙莫更登艫眺予懷益渺然

杭州行宮

玉砌仍今日金鋪異舊時龍歸滄海遠鶯慙月明知垂柳天門拂
平蕪輦道移玉華唐代事空念杜陵詩

杭州解纜

路指錢江外舟行越海濱遠山垂日腳潮水齧船脣歲月催征棹
江湖老釣綸深林愧高隱不必問前津

片帆懸落日流水激孤清風定眠橋影潮平急棹聲長途界吳越

低勢走滄瀛成鼓休辭瘁江湖有臥鯨

江行微雨

風潮如鳥疾細雨一帆懸遠樹皆隨棹新萍不礙船亂濤蒸海氣
兩岸劃吳天屈指來時路匆匆又幾年

遠岸黑微雨深林紅一燈潮頭掀釣艇人影落漁罾伏櫪甯同驥
圖南且效鵬行藏杳未定息轍恨無能

雨過碧松杉平蕪綠上衫扁舟對雲樹默坐數風帆海近驚天闊
潮來覺水鹹羈愁似青草爛漫不能芟

吳淞口

風景不殊異山川催鬢霜雙流合江海一氣共青蒼碧樹帶孤客
金波明夕陽沙鷗似相識拍拍近帆檣
至上海

蜃氣摩蒼穹倒注滄海流龍伯釣連鰲乃沒崑崙邱嗟哉春申江
僻處東海頭何意蹄涔水嘯聚長黃虬上有仙人居五城十二樓
得非晉水仙妖幻起廣州大刀久不奮孫盧事千秋天驕從何來
笑傲多同候臭味合萬族首尾銜千舟烽煙白日暗旌旆蒼天愁
紅樓管絃聲歌舞無時休蛟鰲勢方橫燕雀難爲謀頻年走湖海
此地重來游寒燠異氣候滄桑幾沈浮望海覓神山蓬萊未可求
袖中千金璧夜嘯雙純鉤竊怪天有醉誰知地如球神姦鑄禹鼎
大道非悠悠

望小孤山

潮痕似舊認模糊又向中流見小孤絕頂雲霞空縹緲上方環珮
鎮虛無天梯跨水明朝翠廟火橫江集夜烏蒼蠟支筇復何日枉
勞清夢墮江湖

過江登黃鶴樓

南風一掉橫江來，斜陽照水當窗開。
涵山吞江氣，千萬浩浩瀉入詩人懷。
舉頭不見昔人鶴，白雲如龍上寥廓。
謫仙騎鯨崔顥死，有筆如椽爲誰攔。
樊山霸氣沈千秋，當年此地爭曹劉。
長江天塹豈異昔，邊防今日非鴻溝。
樓外青山自終古，英雄詞客骨已腐。
臨江醉酒歌招魂，深夜蛟龍或起舞。
連艚兩岸馳風檣，來往擲梭低復昂。
蜚廉作虐乃相厄，憑欄獨立心徬徨。
極目鄉關渺何處，識我惟有晴川樹。
欲向仙人借鶴騎，一笛飄然渡江去。

金口

遠水潛蒸霧荒洲，晚聚蚊舟移兩岸。
轉天劃眾流，分曉日欺殘月。
江風驅亂雲，忘機對鷗鳥。
何事更紛紛。

赤壁懷古

獅兒不得中原死江東王氣止於此老狐竊柄芟羣雄橫槊氣已
無江東水軍會獵八十萬一紙吳兒色皆變徒云內事問張昭乞
食之計來相勸生子當如孫仲謀拔劍斫案天爲愁顧曲周郎正
英武臥龍出山如臥虎舳艫千里旌旗紅火雲一捲蒼煙空慘淡
烏林水流血至今猶有沈沙鐵孫劉犄角鬪一曹弩末輕視當塗
高豈獨天塹限南北一時將佐真人豪阻風弔古橫江下眼看來
船奔萬馬有酒但酹亮與瑜不酹牀頭捉刀者

望君山

北渚空凝目南湖但見雲洞庭波嫋嫋楊柳綠紛紛落日蛟龍氣
諸天鸞鶴羣芳洲采杜若何處望夫君

江行雜詩

空山湛虛明星光帶江白孤舟夜不寐惆悵湘中客

積水晦沈陰遠山明電火亂流無泊處空江橫一舸
欸乃棹歌聲鼓枻有漁父嗟彼楚大夫行吟未可語
繫纜綠陰中夕陽多曬網空江不見人時聞落篙響
川光映晚霞濃淡明如畫江邊一飛鳥遙遙落天外
翠柳拂長堤雲開見茅屋日暮無人行炊煙淡相逐
宿燕驚微雨明虹逼晚晴可憐晴與雨日日喚愁生
夏水滿重湖遠天澄一碧何處是君山茫茫一拳石
江上夢還家忘卻路千里夢醒推篷望蒼蒼但煙水
夜雨添新漲江波蝕暗沙不知山上日映作水中霞
王孫不歸去春草尙青青路近心逾切鄉愁落洞庭
五載客他鄉千里還故國江花與江草遙遙若相識
蒼葭夾兩岸隱東大江流月出候蟲急驚人不待秋

山頭一夜雨江邊幾尺波波長復雨阻留滯奈愁何
朝下岳陽城暮泊羅江地試問三閭醒何如岳陽醉
萬頃江湖寬圓天蓋如笠淺水持篙行舟人影相揖
高樹涼風來荒村一星墮夕陽時晦明空江下螢火
荒荒喬口驛長沙望超忽杜老亦千秋何況賈生骨

登天心閣

落日指歸鳥危樓天際高市聲喧下界城影臥空壕
黯淡神威礮清閒戍卒刀登樓話形勝湖海愧吾豪

空靈岸詩史亭

橫江仰高岸危峰壓迴汀石齒劃中開天門夜不扃
豁豁寶殿幽邃逾金庭江波映綠竹佛火光秋螢遐哉杜陵老沿湘道曾經
一身走江海繫念猶生靈螻蟻自竊笑大鯨在滄溟至今眉宇色

猶照江山青峭壁起古魄殘陽下荒亭憑高拜遺像風吹芷蘭馨

賈太傅祠

夏芝岑觀察師重建

祖龍一炬無虞唐赤龍一劍非周商止輦受書逢聖主吹簫織薄
化候王綿叢之儀刀筆律議興禮樂謙未遑天生奇才似有意欲
挽大運躋成康百鳥跄跄一鳴鳳奇律歸昌反驚眾黃頭並列遇
可傷蒼生不問材難用無端謫宦到長沙制度從茲隘漢家楚國
未曾傷鵬鳥梁園翻憾厄龍蛇一自滄桑朝運改湘流日夜東歸
海秋草寒林異昔時鏤鄧周鼎今安在空餘舍館閱興亡單闕於
今又千載董相墳誰下馬尋張良廟尙畱題待漢代吳公今使君
治平第一愛才人重修舊宅披芳草共訪新祠薦渚蘋古今茫茫
弔忠魄江山寂寂歌招魂求賢宣室千秋事欲向神祠問鬼神
長沙定王臺

亦觀察師重建

湘城萬柳搖清秋平楚蒼然消客憂春來孝竹生荒圃日暮慈烏
集戍樓黃圖三輔已榛棘蓼園片土堪遨遊漢家四葉方全盛帝
醉鈞天傳召幸飾貌猶餘丹的妝承恩敢效銀環進李代俄驚龍
夢成木樛遽衍螽斯慶方聞啟發錫嘉名豈謂分離封遠郡自從
茅土錫湘川眷戀慈闈思悄然舞袖空聞圖益地牽衣無奈憾終
天西京傳家法重孝陋矣梁園但歌嘯豈同唐觀望昭陵更勝渭
南起原廟君不見馬王宮殿生蒿蓬吉王臺館荆榛中當日椒蘭
逐煙霧祇今狐兔走秋風雄藩勝地皆安在大雅流風自不同尙
有中興銅馬帝南陽佳氣鬱葱葱

題劉韞齋中丞師綠野引春園

峩峩潭州城中有綠野堂綠野主人壽且康朱顏華髮雙瞳方手
中仙人綠玉杖欲扶宇宙躋虞唐君不見唐家晉公名不朽破蔡

歸來印如斗不偕牛李爭權勢但與劉白酣詩酒鐘鼓園林自一時
風流歇絕今何有我公崛起天南陬東觀蓬山第一流風采輶
軒徧行省星明節鉞鎮雄州前日宗師後良牧獨與湖湘情最篤
袞衣不願以公歸兕觥猶能爲公祝句漏丹砂何必尋洞庭綠酒
方應熟南國舊愛懷甘棠東山娛情有絲竹春風瑤草綠江邊人
到龍門卽洞天方幸階前容李白同登堂上比彭宣舉酒爲公歌
百年門人禮數常周旋敢將綠野引春曲竊比香山長慶篇

黃氏山齋贈別內兄君輔

壽康

昔年別君潭州城孤鴈叫月秋風驚今年別君花石戍斷蛩啼寒
秋雨漬白首毋忘傾蓋心綵毫未損淩雲氣乾坤落落來吾曹雞
蟲得失隨所遭大鵬搏風偶一息下視螟蛉方爭豪龍川自詡睨
千古騎省徒嗟見三毛男兒生世百無補元化胸中自吞吐空將

歲月擲雕蟲浩歎今人不如古金丹大旨言五千金仙要妙虛無
言徒航絕潢望滄海誰從大道探淵源黃虞忽焉世運薄航舫鴻
生謂迂闊同懷自合登青雲吾輩方將老巖壑尊酒甯無再晤期
名山尙有千秋約酒酣萬里淒風來碧草颯颯黃塵開落葉經霜
亂鴉點春華蕭索安在哉丈夫晚節自勉耳浮名役役良可哀夢
駕尻輪倘相見攜手大笑觀蓬萊

贈別內弟季鵠

篤祐

憶昔潢池方弄兵吳越千里無堅城長江天塹竟何在赤眉青犢
交縱橫君家嚴君氣如虎隨陸能文絳灌武虎頭食肉萬里侯投
筆東來志吞虜雨花臺下悲風號秦淮戰血流塞潮功成一棹歸
故里拂衣氣壓湘山高我時弱冠意跌宕公也一見輒心賞鬼方
殺魄悲青燐淚灑西州痛疇曩愛君磊落真雄才興酣落筆驅風

雷愁思且寄青玉案壯志當上黃金臺男兒報國惟忠孝萬卷填
胸足長嘯莫將兒女損風雲寂寂空爲古人笑卽今滄海方橫流
杞人觀天心獨憂羊鶴不舞負高誼飢鷹獨立當清秋明燈黯黯
夜將別朔風蕭蕭窗紙裂他年相見應老蒼對酒高歌唾壺缺霜
天眾壑搖青松木葉滿地驚寒蛩乾坤蒼茫感離思壁間雄劍飛
兩龍延津他年倘復合瀛海萬里乘天風

贈李荔村

夢瑩

卽以誌別

殺皇之初方樂康我年未冠登詞場黃犢初生氣如虎逢君崛起
爭鴈行昔年愛君氣奇崛今年見君仍蛟屈碧海珠光乍晦明豐
城劍氣猶沈鬱文章小露世已驚富貴微名竟何物一城南北分
鴻溝相望每如風馬牛杜陵舊雨久不至昌黎爲雲空掉頭涼風
夜撼鄉園樹空山落木瀟湘路少年翩翩盛裘馬美人娟娟歎遲

暮江湖空老牧之年壁立誰憐長卿賦男兒意氣當橫行百年鼎
鼎愁無成雕蟲小技少時事老驥壯心千里輕名山著書志苦晚
相期與子珍平生落日滄江更回首霜天澹澹孤鴻鳴

送懷欽登第北上

昔年求友潭州城握手大笑千人驚阿大蟬聯語終夜鳳觀虎視
心縱橫

先皇之末都門別滄海東流助鳴咽金臺萬柳搖清秋古寺寒鴉
半明滅蒼茫獨立天南頭西望長安詠四愁劫火蓬蒿萬松月涼
風桂子六橋秋此時思君在京邑會稽禹穴難同遊君才豈止十
倍我磨蝎同宮亦坎坷金門上書謀不用稷下談天計仍左人海
聚散飄萍蓬契闊五年欣再逢方謂雲霄振六翮豈知風雨分雙
龍東山此出蒼生迫莽莽乾坤老詞客海波方恐變桑田才人豈

合沈山澤相交何必貢公冠相贈無忘賈生策一別逢誰眼更青
重來恐已頭皆白霜天萬木秋風枯失羣斷鴈聲相呼武安抵掌
摩燕闕伯鸞長謠適海隅山林朝市大小隱吾道顯晦原非殊期
君當路宏遠謨故人落魄方江湖

湘江晚眺

平峰歛暮色中流橫暝煙空水半顯晦一望皆蒼然羈服苦多鬱
登艫眺湘川漁子釣新月神鴉隨客船極望盡緬邈歸思亦渺綿
平生薄鐘鼎素抱潔芳荃願託南山豹甯慕漢廷蟬誰令棄夙志
狂走擲華年

舟中讀楚辭

明明江上月照此離騷歌懷沙竟已矣哀郢憾如何古色黯佩蘭
幽光歇裳荷當時憂國淚尚灑湘江波憶昨登長途維舟弔汨羅

窈窕若有人恍惚山之阿君王獵青兕孤臣駕靈鼉彭咸竟賁志
魯陽莫迴戈遊說良已誤失計甯非和遂令黃棘策難向青天呵
蕭艾久莫辨芳馨今豈多懷古空長謠悲風吹女蘿

旅感

徂節驚流丸韶顏惜奔箭山川豈固殊景物條已變庭草懷昔青
霜林改今積天寒魚影伏木落鳥巢見曾是行路難云誰苦心薦
大志空慷慨下澤慚郡掾焉知結網後徒有臨淵羨名尸諒難爲
道勝息交戰

嘉魚懷古

揚靈汭湘流遵渚越都縣晨煙乍陰陽古堞時隱見慨彼金虎亂
頓駭羣龍戰蔽空盛旌旗沿江急羽箭快哉赤壁焚竟緩黃初禪
同心拒降議豈曰非英彥事去雄圖空年來大運變慘淡沈沙戟

寂寞中軍扇緬彼烏林役慨想樊山宴

江上晚眺

大星搖搖光欲墮萬頃蒼茫曖漁火長波接天煙不收斷岸千尺橫一舸霜風捲水秋夜寒荒村隱約枕江干海客釣竿不敢下深淵恐有蛟龍蟠明月出山挂高樹橫江一白夜疑曙舟人晚傍鷗鷺眠時有孤鴻掠波去

滬上歸舟偶書所見

夜從滬瀆歸乃過東門橋萬馬爭騰蹄人聲亦何囂天吳昂其首海若不敢驕地藏日發洩蜃樓高岩髯電光金蛇躍燐氣碧火妖夾水千炬列懸空萬星搖結璘避中天白晝迷清宵反易大造常半令元化消吾聞海外客力能連六鼉員岱一以傾仙靈恐終漂被昏豈知此狂馳方暮朝椒蘭逐煙霧脂粉流塞潮舉首望空水

乾坤氣清寥誰能挽天河高酌北斗杓

過黃浦

孤舟掉月來丹楓帶霜醉鴈叫寒氣積雞鳴潮聲至江流澹孤清
岸草餘幽翠嗟予江海人慨此滄洲意賞晤良云高蘊靈境斯異
其如懷舊情重以思親淚欣戚遂以交身世兩難棄何當逃物表
終以尋吾契

江行遇風

石燕驚風起寒渚寂無喧潑潑葭莢亂飛飛鷗鷺翻大聲起蘋末
孤煙捲蓬根時欲舟中目遠看原上村密途曠歲月馳節歷涼溫
對此征魂靜乃欣吾道存推篷避淒冷欹枕聽潺湲碧草日蕭瑟
悠哉懷故園

讀顧亭林先生詩

歸昌振奇律不以文章名洪鐘合鈞天難爲靡曼聲先生秉高節
曠世始一鳴雅抱在三代遙懷託東京雄略不一試晚節猶西行
關門辨氣紫陵樹哭冬青感時杜老歎望闕騷人情流落泰山芒
振掉碧海鯨辭高絕虛僞義激仍和平永懷大雅作彌念遺風清
讀王船山先生詩

芷蘭歇湘江黯淡騷人國淵微振風詩幽異起古色先生王佐才
非時困荆棘卓識睨千古勗論恢萬億微吟獨和平依永自沈默
悒悒德人語賢者固不測餘篇或恢詭光采難更匿荒唐山鬼歌
悽麗湘靈瑟石室今猶存斯才豈重得高詠五言句遙懷百代則
杭州懷古

鳥喙雄風海畔豪龍飛王氣越山高武安偏賜軍中劍長樂方橫
膝上刀忍見虜庭歸半臂由來家法忌黃袍龍川萬古心胸在獨

對錢唐首自搔

西遼斬使未忘仇南渡稱臣刺足羞師相竟歸新篋首亡秦不挂
藁街頭魂銷馬角冰天雪聲斷蟆更桂子秋誰使孤臣蹈東海朱
仙鎮上哭聲愁

夢醒東京花石綱鳳林月色亂湖光金牛現處誇形勝泥馬歸來
背上皇一德格天無舊閣半閒鬪蟀只空堂青山歌舞年年好無
那柴車又朔方

長城自壞小朝廷瑞應中興太杳冥一代運終天水碧六陵人哭
樹冬青黃龍痛飲前機失白鴈歌來識語靈自古通和終誤國問
誰風景泣新亭

三十初度

早歲志五嶽壯懷凌九仙一從誤西笑未果還東山歲月嗟道長

風霜驅馬斑金丹未可成玉顏甯久妍入洛愧高譽射策非華年
尺寸空有志竹帛信難宣緬懷古達人處道龍蛇間藏名託琴酒
高步躡雲煙方當謝羈勒遂初歸田園斯言豈虛託上有蒼浪天